

TÌTULU III

ISTITUTUS DE PARTECIPATZIONI E DIRITUS DE IS CITADINUS

Capu I - Partecipazioni e decentramentu

Art. 36 - Partecipazioni popolari

1. Su Comunu promovit e tutelat sa partecipazioni de is citadinus, solus o assotziaus, a s'aministratzioni de s'enti po ndi assigurai s'andamentu bonu, s'impartzialidadi e sa trasparèntzia;
2. Sa partecipazioni popolari si fait po mesu de s'incentivatzioni de is formas de assòtziu e de voluntariau e su diritu de is citadinus solus a intervènniri in su procedimentu aministrativu;
3. Su Consillu Comunali apariciat e aprovat unu regulamentu innoi si narant is maneras chi tenint is citadinus po fai bàlliri is diritus e is prerogativas previdias de custu titulu.
4. In su procedimentu aministrativu chi pertocat a su fai àutus ca tocat situatzionis giurìdicas sogetivas a is intaressaus est garantèssia sa partecipazioni segundu is princìpius stabilius de sa lei 07 Austu 1990, N. 241.

Art. 37 – Formas de assòtziu.

1. Su Comunu arriconnoscit e promovit is formas de assòtzius chi ci funt in su territòriu cosa sua.
2. C'est unu albu innoi funt iscritus a pregunta is organìsimus de assòtzius chi traballant in su Comunu. In sa pregunta de iscrizioni ant a dèpiri èssiri indicau: is finalidadis, is òrganus, is sogetus chi tenint rapresentàntzia, sa consistèntzia assotziativa e dònna àtera cosa bella po identificai s'organìsimu assotziativu.
3. Cun su scopu de tènniri s'inserimentu in s'albu comunali serbit chi s'assòtziu lassit in Comunu còpia de su Statutu e nerit cali est sa sedi e su nòmini de su rapresentanti legali.
4. No est amìtiu s'arriconoscimentu de assòtzius segretus o chi tenint caraterìsticas chi non funt compatibilis cun inditus generalis naraus de sa Costitutzioni, de is normas chi ci funt e de custu Statutu.
5. Is assòtzius registraus depint presentai dònna annu su bilànciu insoru.
6. Su Comunu podit promòvi e fai sa consulta de is assòtzius.
7. Su Comunu incentivat sa costitutzioni de sa Consulta de is antzianus e ndi promovit is atividadis.

Art. 38 - Diritus de is assòtzius

1. Dònna assòtziu registrau tenit diritu, po mesu de su rapresentanti legali o delegato cosa sua, de biri is datus chi tenit s'aministratzioni e de ddus castiai, a pregunta, po is iniziativas de s'enti innoi traballat.

2. Is sceras aministrativas ca tocant s'atividadadi de is assòtzius depint tènniri prima is pareris donaus de is òrganus collegialis de issas etotu. Is pareris depint arribai a s'enti in su tempus stabilius in sa pregunta, ca a dònna manera non depit èssiri prus pagu de cuìndixi dis.